

दिनांक 17.05.2024

समय: 18.45 बजे

आकाशवाणी जयपुर-अजमेर
प्रादेशिक समाचार ।

- लोकसभा चुनाव रा पांचवां दौर मांय प्रचार चरम माथे-ई दौर रा तैत 20 मई ने वोट पड़ेला ।
- कोटा विश्वविद्यालय तुर्की रा एक विश्वविद्यालय सागे भणार्ई-लिखाई, अनुसंधान अर पर्यटन शिक्षा सारू करार कीनी ।
- 77वां कान्स फिल्म महोत्सव मांय ई दफ़ा भारत पर्व राख्थी ज्यो ।
- प्रदेश मांय पड़ रह्या जोरदार तावड़ा ऊं लोग बेहाल-मौसम विभाग आवता एक सप्ताह तांई लू बाजती रेहवण रा आसार जताया ।

000

लोकसभा चुनाव रा पांचवां दौर रा तैत प्रचार रो काम जोरा ऊं चाल रह्यो है । ई दौर मांय प्रचार रो काम काल सिंज्यां पूरो व्हे जावेला । चुणाव रा पांचवां दौर रा तैत 20 मई ने वोट पड़ेला । ई बीचे लोकसभा चुनाव रा सातवां अर आखिरी दौर सारू नाम पाछा लेवण रो आज आखिरी दिन हो । ई दौर मांय सात राज्यां अर केंद्र रा राज वाळा एक प्रदेश मांय 57 लोकसभा सीटां सारू वोट पड़ेला । उत्तर प्रदेश अर पंजाब री 13-13, पश्चिम बंगाल री 9, बिहार री 8, ओडिशा री 6, हिमाचल प्रदेश री 4, झारखंड री 3 अर चंडीगढ़ री एक सीट माथे एक जून ने वोट पड़ेला । लोकसभा चुणाव रा सगळा सात दौर मांय पड़्या वोटों री गिणती 4 जून ने करी जावेला ।

000

सरकार न्यारी-न्यारी बीमारियां रा ईलाज मांय काम आवण वाळी 41 दवाइयां अर छह फॉर्मूलेशनसन रा मोल मांय कमी कीनी है । आ मांय शुगर, हार्ट अर लिवर री बीमारियां रा ईलाज री दवाइयां शामिल है । राष्ट्रीय औषधि मूल्य निर्धारण प्राधिकरण री मीटिंग मांय दवाइयां बणावण वाळी कंपनीयां ने ई बाबत हुकम दिया ज्या है ।

000

कोटा विश्वविद्यालय तुर्की रा कोकाटेपे विश्वविद्यालय सागे एक करार माथे सही कीनी है । कोटा विश्वविद्यालय री कुलपति प्रोफेसर नीलिमा सिंह बतायो के पांच साल रा ई करार रा तहत दोन्यु विश्वविद्यालय माली, सांस्कृतिक अर सामाजिक मुद्दां माथे आपसी समझ बधाता थकां भणार्ई-लिखाई, अनुसंधान अर पर्यटन ऊं जुड़्या कोर्स मांय भागीदारी तैय करेला ।

000

आज वर्ल्ड हाइपरटेंशन-डे मनायी ज्यो । इण रो ई साल रो मुद्दो लम्बे समय तक जीने के लिए, अपने ब्लड प्रेशर को सही से जांचो और काबू करो" राख्थी ज्यो । ई मौके प्रतापगढ़ मांय राख्थी

ज्या सेमिनार मांय प्रमुख चिकित्सा अधिकारी बतायो के डब्ल्युएचओ रे मुजब देश मांय हर चौथा जणा रे हाई बी.पी. री बीमारी है।

वे कहयो के इण ऊं बचाव सारू टेम-टेम परां बल्डप्रेसर री जांच करावणी चाहिजे। ई मौके भरतपुर रा आरबीएम अस्पताल मांय संगोष्ठी राखी ज्यी। संगोष्ठी मांय डॉक्टर हाइपरटेंशन रे कारण व्हेवण वाळी बीमारियां रा बारा मांय जाणकारी दीनी। ई मौके सवाईमाधोपुर जिला मांय राखी ज्यी संगोष्ठी मांय स्वस्थ जीवन सारू बत्ती तादाद मांय फल-तरकारियां, साबुत अनाज अर कम चिकनाई वाळी चीजां खावण अर प्रोसेस्ड अर सोडियम री बत्ती तादाद वाळा जंक फूड ऊं परहेज करण माथे जोर दियो ज्यो। ई रे अलावा तनाव कम करण सारू गहरी सांसां लेवण, ध्यान, योग करण, नियमित कसरत करण अर संवारे या सिंज्यां री पोर टहलबा री राय दीरीजी। ई मौके चूरू मांय झुगगी-झोपडी मांय रेहवण वाळां अर बेसहारा लोगां ने सामाजिक कार्यकर्ता फल बांट्या।

000

77 वां कान्स फिल्म महोत्सव मांय ई दफा भारत पर्व राखी ज्यो। सूचना अर प्रसारण मंत्रालय रा सचिव संजय जाजू री मेजबानी मांय व्ह्या ई पर्व रे दौरान भारत री समृद्ध संस्कृति, खाण-पीण अर हाथ री कारीगरी री झलक निजर आयी। ई सागे ई भारत री फ़िल्मां ऊं कान्स महोत्सव मांय रौनक बध ग्यी। भारत पर्व मांय 55 वां भारतीय अन्तरराष्ट्रीय फिल्म महोत्सव-इपफी रा पोस्टर रो विमोचन ई करी ज्यो।

000

प्रदेश मांय झुलसा देवण वाळी गर्मी ऊं जिन्दगी माथे घणो असर पड रह्यो है अर घणखर हलकां मांय लोग बेहाल है। घणखर ठौड़ां पारो 42 ऊं 44 डिग्री सेल्सियस बीचे दर्ज करी ज्यो। लू रे कारण लोग मांदा व्हेवण लाग्या है। सवाईमाधोपुर ज़िला मांय आज ई तेज गर्मी रे कारण बाजार सूना निजर आया। चूरू मांय आखा दिन लू बाजती रही। बालोतरा मांय कदे-कदे बादळा मण्ड जावण रे बावजूद पारो 44 डिग्री सेल्सियस ताई चढ़ ग्यो। बीकानेर मांय ई पारो 45 डिग्री सेल्सियस रे आरे-सारे व्हेवण ऊं सरहदी हलका मांय बत्ती गर्मी रो अहसास व्हे रह्यो है। झालावाड़ अर जैसलमेर ज़िलां मांय ई तेज गर्मी पड रही है।

मौसम विभाग आवता दिनां पारो थोड़ो और चढ़बा रा आसार जताया है। मौसम केन्द्र जयपुर रा निदेशक राधेश्याम शर्मा बतायो के राज्य मांय लू रो दौर आवता एक सप्ताह ताई चालण री शंका है।

दूजी कानी अजमेर मांय आज बिरखा व्हेवण ऊं गर्मी ऊं थोड़ी साता मिली। **जोधपुर** रा लूणी अर **नागौर** मांय ई बारिश व्ही।

000

भरतपुर-जयपुर नेशनल हाईवे माथे आज व्ह्या एक हादसा मांय 4 महिला मुसाफिरां री मौत व्हे ग्यी। म्हाणा भरतपुर खबरनवीस बतायो के ट्रक अर उत्तर प्रदेश रोड़वेज री बस बीचे टक्कर ऊं हो हादसो व्ह्यो।

000

सांचौर ज़िला रा रानीवाड़ा मांय आज सौहार्द युवा खेल होड़ सरू व्ही। ई होड़ रो मकसद ज़िला रा सरहदी हलकां मांय रेहवण वाळा गांव वाळां अर नौजवाना सागे पुलिस अर प्रशासन रो तालमेल बणावणो अर जनता मांय पुलिस रा प्रति भरोसो मजबूत करणो है। होड़ रानीवाड़ा सागे ई सांचौर अर सरवाना मांय ई राखी जा रही है। आज रानीवाड़ा मांय राखी ज्यी वॉलीबॉल होड़ मांय 6 टीमां सिरकत कीनी।

000

खाद्य सुरक्षा अर औषधि नियंत्रण आयुक्तालय री ओर ऊं आज जयपुर रा विश्वकर्मा औद्योगिक हलका मांय घटिया घी रो स्टॉक बरामद कीनो। कार्रवाई रा तहत 13 हजार 700 लीटर खराब गुणवत्ता रो घी बरामद करी ज्यो।

000

बूंदी ज़िला री बड़ौदिया ग्राम पंचायत ने मॉडल ओडीएफ प्लस अर आदर्श गांव बणावण सारू ज़िला परियोजना समन्वयक सरपंच सागे गांव रो दौरो कर र व्यवस्थावां रो जायजो लीनो। ई पाछे बड़ौदिया पंचायत ने ओडीएफ बणावण सारू कार्य योजना बणायी ज्यी।

000

राजस्थान लोक सेवा आयोग न्यारी-न्यारी भर्ती परीक्षावां रा बारा मांय हाई कोर्ट अर सुप्रीम कोर्ट रा न्यारा-न्यारा फ़ैसला आयोग री वेबसाइट माथे अपलोड कीना है। आयोग रा अध्यक्ष संजय श्रोत्रिय कह्यो के इण ऊं उम्मीदवारां ने भर्ती परीक्षा ऊं जुड़ी तथ्यात्मक अर सटीक जाणकारी मिल सकेला।

000

इन्दिरा गांधी राष्ट्रीय मुक्त विश्वविद्यालय जुलाई 2024 सत्र मांय दाखिला री प्रक्रिया सरू कर दीनी है। इग्नू रा क्षेत्रीय केन्द्र जयपुर री वरिष्ठ निदेशक डॉ. ममता भाटिया आ जाणकारी दीनी। वे बतायो के स्नातक, स्नातकोत्तर, डिप्लोमा, पीजी डिप्लोमा अर सर्टिफिकेट कोर्स मांय दाखिला सारू 30 जून ताई अर्जी दी जा सके है। दाखिला सारू विश्वविद्यालय री वेबसाइट www.ignou.ac.in माथे नाम मण्डावणो व्हेला।

000

डाक विभाग गांवां मांय ई स्पीड पोस्ट, रजिस्ट्री अर पार्सल बुकिंग रो सुबीतो सरू कीनो है। जयपुर देहात मण्डल रा डाक अधीक्षक जी डी गुप्ता बतायो के गांवां रा डाक खानां ने ई ऑन लाईन कर दिया ज्यो है। वे बतायो के गांवा रा डाकखानां ने एक मशीन अर छापण री मशीन मुहैया करा दीरीजी है, ज्यी पाछे गांवां रा डाकखानां ऊं ई स्पीड पोस्ट, रजिस्ट्री अर पार्सल कराया जा सके है।

000

कोटा री संभागीय आयुक्त उर्मिला राजौरिया आज बारां रा जिला अस्पताल रो दौरो कर र व्यवस्थावां रो जायजो लीनो। वे अहलकारां ने साफ-सफाई री व्यवस्था बणायी राखण गाडियां ऊबी करण री व्यवस्था मांय सुधार समेत न्यारा-न्यारा हुकम दीना। सवाईमाधोपुर जिला रा प्रभारी सचिव ई आज सामाजिक न्याय अर अधिकारिता विभाग रा दफ्तर रो दौरो कर र सामाजिक सुरक्षा पेंशन, छात्रवृत्ति अर दूजा सुबीता बेहतर बणावण रा हुकम दीना।

000

भ्रष्टाचार निरोधक ब्यूरो टोंक मांय महिला पुलिस थाणा रा एक ए.एस.आई. ने 15 हजार रुपया री घूस लेता थकां पकड लीनो। ई पाछे आरोपित रा रहवास परां ई जांच करी जा रही है।

000